

皇朝詞林典故

卷二
十二

PL
2548
C55
1887
v.13

MAR 24 1975

皇朝詞林典故卷二十二

職掌

入直侍班

天聰三年

命儒臣分直文館。

順治十年十月。

命內院大學士。學士。於

命內太和門內更番入直。

十七年。

諭翰林院翰林各官原係文學侍從之臣。今欲於景運門內建造直房。令翰林官直宿。朕不時召見顧問。兼以觀其學術才品。應分幾班。每班酌用幾員。卽列名具奏。尋掌

院學士折庫訥。王熙議。請分翰林官

爲三班。每班用講讀學士二員。講讀
二員。編檢四員。依次入直。周而復始。
又言臣等與各官職掌相同。應否一
體。分日直宿。得
旨。是折庫訥。王熙著直宿。

康熙十六年。

諭大學士等。朕不時觀書寫字。近侍內並無

博學善書者。以致講論不能應對。今欲於翰林內選擇二員。常侍左右。講究文義。但伊等各供厥職。且在外城。不時宣召。難以卽至。著於城內撥給閒房。停其陞轉。在內侍從數年之後。酌量優用。再如高士奇等能書者。亦著選擇一二人。同伊等入直。爾衙門議奏。尋大學士等列名上請。

命侍講學士張英。內閣中書銜高士奇。供奉

內廷。

諭張英。高士奇。選爾等在內供奉。當謹慎勤
勞。後必優用。勿得干預外事。

謹按張英等供奉

內廷。是爲

南書房。

懋勤殿入直之始以後

南書房皆奉

特旨召入。自大學士。尙書。侍郎。京堂。以及翰林院詹事府等官。皆得與焉。

三十三年。

諭掌院學士張英。翰林乃近侍之臣。向因日講時時進見。是以猶知伊等言語舉止。近

來進見稀少。講官侍班。不過頃刻。難以悉其賢否。著將翰林詹事官。每日派四員。到南書房侍直。令伊等學習文章字畫。亦可以知其人之高下。以備擢用。

五十三年。

諭翰林官員。朕多不識。其學問之高下。亦不能悉知。嗣後朕駐蹕暢春園時。著四人一

班與南書房翰林一處行走。五日一更代。

謹按此例於六十一年停止。

五十七年

諭吏部各部院衙門滿洲官員在侍衛班行走。漢官每遇奏事。派六員引見。科員及御史無論巡城。不巡城奏事日。令滿洲三員。漢人三員侍班。翰林亦派出五員侍班。此

侍班人員內。如有不得來者。不妨聽其缺少。其數不必補足。如此可得認識矣。

謹按此例亦於六十一年停止。

雍正三年。大學士馬齊等八奏折本。

得

旨。嗣後辦事之日。每次將編修檢討輪流派出四人。同科道侍班學習行走。

乾隆五年二月。大學士等議覆內閣
學士張照奏稱。

武英殿翰林等。俱兼別館辦事。

殿直既非奉

旨。自必轉以餘力及之。難免日漸廢弛。請以
後

武英殿行走。並開列請

旨補用。

是年七月。

諭翰林院編修檢討人員。朕多未識認。著翰林院該班之日。每次帶領二十員引見。

是年十月。

諭編修檢討等。嗣後著翰林院該班日。每次帶領十員引見。

四十三年

諭。向會令翰林院於輪班日期。帶領編檢十人引見。以備甄識。近年來久未舉行。著於三月內朕謁

陵回鑾後。仍照舊例。將現在編檢。按班通行輪帶。嗣後每閱五年。卽請旨辦理一次。

嘉慶五年正月。

諭向例翰林院於直日之期。將編檢等官輪班帶領引見。近年未經舉行。嗣後該衙門直日時。仍照向例豫備引見。

是年二月。掌院學士奉

旨。嗣後翰林院編檢輪班引見。著於開印後舉行一次。

謹按輪班引

見乾隆二十一年有間一班之奏二十三
年有間兩班之

旨三十八年後未經舉行四十八年五十五
年舉行兩次五十八年未經奏辦至

是奉

旨始復乾隆五年之例

尙書房侍直

康熙三十二年。

命原任侍講徐元夢入直

尙書房。

謹按

尙書房侍

皇子授經書。京堂翰詹咸得

簡充。初由掌院保奏年紀老成學問優長

者。後俱令大學士等公同揀選擬定。

正陪引

見。以大學士尙書等官爲總師傅。其地在

乾清門之東。

又按三十二年以前無

尙書房之名。雍正年間凡入直者尙稱
爲教書課讀。其地或在

南薰殿。

西長房。

兆祥所。

咸福宮。嗣後皆稱爲

尙書房行走。

扈從

凡扈從

躬謁

陵寢。

巡狩方岳。吏部列本院侍讀侍講學士名

具奏。

順治九年。內院大學士希福等奏

駕出京城。臨幸別所。詞臣照常扈從。

駕幸城內各處。其扈從與否。請

旨定奪得

旨除出城扈從外。其在城內。或幸王府。及他所。亦令扈從。若往南臺景山。不必隨行。

康熙五十年奉

旨翰林院滿洲漢軍翰林甚多。每行圍著二人學習行走。

謹按滿洲漢軍扈從。名依都圍。由本

院奏派乾隆三十二年正月。

聖駕巡幸天津。掌院上扈從銜名得

旨著派一員隨往。後遂爲例。

纂修書史

凡纂修

實錄。

聖訓。掌院學士充副總裁官。侍讀學士侍講。

學士侍讀侍講修撰編修檢討充纂
修官亦充提調官筆帖式充謄錄官
亦間充收掌官纂修

玉牒以滿洲蒙古漢軍修撰編修檢討職
名移宗人府充纂修官亦間以庶吉
士移送其編輯諸書掌院學士充正
副總裁官讀講學士以下編檢以上

充纂修官。亦充提調官。庶吉士亦充纂修官。編輯諸書。刊刻告竣。皆得奏請。

頒賜。其先經在事諸臣。及告竣時。已出館局者。並許列銜。

謹按纂輯諸書。惟

國史。及

武英殿修書處。係常設之館。

玉牒則閱十年一修。其他皆隨時開設。

實錄

聖訓而外。若

會典。方畧。昭忠列傳。皆閱時增輯。其因
事立名。如三禮三通等館。書竣則館
卽停。例皆以翰林官充提調總纂纂

修協修等官

國史館

武英殿皆提調二纂修十功臣館滿提
調二漢提調一纂修協修皆無定額
會典方畧館提調纂修官不專屬翰詹
其

特旨纂輯諸書各官員額俱隨時增定。

天聰元年。

命恭纂

太祖高皇帝實錄。

聖訓。

九年。

命恭纂

太宗文皇帝實錄。

順治二年。初。

命館臣纂修明史。

謹案

列聖命纂諸書。不可勝紀。茲專載翰詹各官
立館承修者。其。

特命一二臣。及部院諸臣編纂之書。非關本
院職掌。概不備載。

十三年。

勅輯通鑑全書。易經通註。

十五年。

勅纂通政全書。

康熙六年。

命恭纂

世祖章皇帝實錄。

十六年。

勅編日講四書解義。

十八年。

勅纂續修明史。

十九年。

勅編日講書經解義。

二十一年。

勅撰孝經衍義。

二十二年。

命重修

太祖高皇帝實錄。

聖訓。並恭纂

太宗文皇帝。

世祖章皇帝。

聖訓。

是年。

勅編曰講易經解義。

二十五年。

諭禮部翰林院。自古帝王致治崇文。典籍具備。猶必博採遺書。用充秘府。蓋以廣見聞而資掌故。甚盛事也。朕留心藝文。晨夕披

覽。雖內府書籍。篇目粗陳。而哀集未備。因
思通都大邑。應有藏編。野乘名山。豈無善
本。今宜廣爲訪輯。凡經史子集。除尋常刻
本外。其有藏書秘錄。作何給值。採集繕寫。
爾部院會同詳議。務搜羅罔軼。以副朕稽
古右文至意。又

諭自古經史書籍。所重發明心性。裨益政治。

必精覽詳求。始成內聖外王之學。朕披閱
載籍。研究義理。凡厥指歸。務期於正。諸子
百家。泛濫詭奇。有乖經術。今搜訪藏書。善
本。惟以經學史乘。實有關係修齊治平。助
成德化者。乃爲有用。其他異端詖說。概不
准收錄。

三十八年。

勅撰春秋傳說彙纂。

四十三年。

勅撰佩文韻府。

四十九年。

勅撰淵鑑類函。

五十一年。

勅撰歷代紀事年表。

五十二年。

諭翰林官員內。多有不識字義。不能作詩文者。此皆教習不勤之故。比年以來。武英殿行走之人。鄉會試中式者甚多。蓋以在武英殿行走。每日不釋卷耳。此後凡修書校書處。著併派庶吉士。

五十四年。

勅纂周易折中音韻闡微。

欽定詞譜。

五十五年。

勅撰康熙字典。

五十六年。

勅撰性理精義。

五十八年。

勅撰駢字類編。

五十九年。

勅撰韻府拾遺。

六十年。

勅撰書經傳說彙纂。詩經傳說彙纂。子史精

華。分類字錦。

雍正元年。

命恭纂

聖祖仁皇帝實錄。

聖訓。並編次古今圖書集成。

謹按圖書集成。爲冊府之大觀。

聖祖仁皇帝時。曾詔儒臣編輯。至是復奉

特旨。添簡總裁編纂。至雍正三年告成。

二年。

命館臣續修明史。

謹按明史之修。肇始於順治二年。康熙中。徵博學宏儒續修。迄未削藁。至是大學士張廷玉等率儒臣編纂。於乾隆四年告成。

六年。

勅撰執中成憲。

乾隆元年。

命恭纂

世宗憲皇帝實錄。

聖訓。並編次日講禮記解義。

謹按日講禮記解義爲

聖祖仁皇帝講筵舊藁。未及成帙。至是始成
完書。

七年。

勅撰國朝宮史。

九年。

勅撰詞林典故。

十二年。

勅撰續文獻通考及

皇朝文獻通考。

十三年。

勅撰儀禮禮記周禮義疏。

十五年。

勅撰叶韻彙輯。

二十年。

命纂周易述義。

二十三年。

勅撰

御纂春秋直解。

二十四年。

勅撰

皇朝禮器圖式。

三十年。

諭。朕恭閱

世祖章皇帝實錄。內載大學士甯完我劾奏
陳名夏之疏。有與魏象樞結爲姻黨一款。
朕向聞魏象樞在漢大臣中尙有名望。乃
與黨惡之陳名夏聯姻。藉其行私護庇。則
亦不得謂之粹然無疵之名臣矣。因取國
史館所撰列傳。祇稱以事降調。而不詳其
叅劾本末。則後之人亦何由知其事爲何

事而加之論定乎。向來國史館所輯列傳。原係擇滿漢大臣中功業政績素著者。列於史冊。以彰懿懃。其無所表見。及獲罪罷斥者。概屏弗與。第國史所以傳信。公是公非所關。原不容毫釐假借。而瑕瑜並列。益足昭衡品之公。所謂據事直書。而其人之賢否自見。若徒事鋪張誇美。甚或畧其所

短暴其所長。則是有褒而無貶。又豈春秋
華衮斧鉞之義乎。且以衆所共譽之魏象
樞。尙有瑕隙可抵。非今日因事稽覈。誰復
摘其隱微。若罪惡顯著之陳名夏。及楊義
所叅交結黨援之孫承澤。俱曾身爲大臣。
特以身名隕越。國史擯而弗書。將世遠年
湮。更無有知其罪狀之昭宣。與夫糾彈之

顛末。伊等轉得以文辭著述。掩蓋其生平。則其餘美惡叅半之人。境過事忘。因而彌縫隱護者。益復不少。卽如索額圖明珠。徐乾學高士奇輩。當時非不藉藉人口。而跡其行事。或則恃才自恣。或則依附結納。交通聲氣。雖學問或有可稱。而品誼殊無足取。此等若非官爲立傳。則世人毀譽任情。

久竟流傳失實。且其載之家乘。大率不外
乎行狀墓誌。非其子若孫志在顯親。卽其
門下士工於諛墓。將必自撰私傳。轉致掄
揚溢分。徵實難憑。昔年滿洲淳樸之風。從
無是事。而世代遞降。薰於習染。一二性喜
詩文之人。生前唱和吹噓。身後假他人筆
墨。誇張阡隴者。亦頗有其人矣。卽如索額

圖明珠。揆叙。阿靈阿等。皆以世臣勲閥。身
罹愆尤。國史概從屏斥。久之。且不知其爲
何如人。又何以爲一代汗青之據。前命廷
臣。編纂宗室王公功績表傳。現已告成。事
實釐然可考。因思大臣之賢否。均不可隱
而弗彰。果其事功學行。卓卓可紀。自應據
實立傳。俾無溢美。若獲罪廢棄之人。其情

罪允協者。固當直筆特書。垂爲炯戒。卽當
日彈章過於詆毀。吏議或未盡持平。亦不
妨因事並存。毋庸曲爲隱諱。從前國史編
纂時。原係彙總進呈。未及詳加確覈。其間
秉筆之人。或不無徇一時意見之私。抑揚
出入。難爲定評。今已停辦年久。自應開館
重事輯修。著將國初以來滿漢大臣。已有

列傳者。通行檢閱。覈實增刪。考正其未經
列入之文武大臣。內而卿貳以上。外而將
軍督撫提督以上。並宜綜其生平實蹟。各
爲列傳。均恭照

實錄所載。及內閣紅本所藏。據事排纂。庶幾
淑慝昭然。傳示來茲。可存法戒。朕將特派
公正大臣爲總裁。董司其事。以次陸續呈

閱。朕親加覈定。垂爲信史。並著該總裁官
將作何蒐輯酌定章程。不致久稽時日之
處。詳議具奏。又

諭。前以國史原撰列傳。止有褒善。惡者惟貶
而不錄。其所以爲惡。人究不知。非所以昭
傳信也。因降旨。開館重修。特派大臣爲總
裁。董司其事。並令詳議條例以聞。今據該

總裁等議奏開館事宜內稱滿漢大臣定以官階分立表傳。旗員自副都統以上。文員自副都御史以上。及外官督撫提督等。果有功績學行。及獲罪廢棄原委。俱爲分別立傳等語。所議尙未詳備。列傳體例以人不以官。大臣中如有事功學術足紀。及過蹟罪狀之確可指據者。自當直書其事。

以協公是公非。若內而部旗大員。循分供職。外而都統督撫之歷任未久。事實無所表見者。其人本無足重輕。復何必濫登簡策。使僅以爵秩崇卑爲斷。則京堂科道中之或有封章建白。實裨國計民生者。轉置而不錄。豈非缺典。且如儒林。亦史傳之所必及。果其經明學粹。雖韋布之士不遺。又

豈可拘於品位。使近日如顧棟高輩。終於
湮沒無聞耶。舉一以例其餘。雖列女中之
節烈卓然可稱者。亦當覈實兼收。另爲列
傳。諸臣其悉心參考。稽之諸史體例。折衷
斟酌。定爲凡例。按次編纂。以備一代信史。
至立表之式。固當如所定官階爲限制。仍
應於各姓氏下註明有傳無傳。使覽者於

表傳並列者。卽可知某某之媿惡瑕疵。而
有表無傳者。必其人無足置議。有傳無表
者。必其人實可表章。則開卷瞭然。不煩言
而其義自見。朕每覽歷代史冊。褒譏率無
定評。卽良史如司馬遷。尙不免逞其私意。
非阿好而過於鋪張。卽怨嫉而妄爲指摘。
其他更可知矣。我朝百餘年來。於大小臣

工彰善癉惡。一秉至公。實可垂爲法戒。今
悉據事覈實。立爲表傳。總裁大臣公同商
推。朕復親爲裁定。傳之萬世。使淑慝並昭。
而衮鉞不爽。不更愈於自來秉史筆者之
傳聞異辭。而任愛憎爲毀譽者耶。將來成
書後。卽以朕前後所降諭旨。弁之簡端。用
示慎重修輯國史之意。

三十二年。

勅撰續通典續通志。

皇朝通典。

皇朝通志。

御批通鑑輯覽。

三十六年。

勅撰遼金元三史國語解。

三十八年。

命編輯四庫全書。

諭曰。軍機大臣議覆朱筠條奏。內將永樂大典擇取繕寫。各自爲書一節。議請分派各館修書翰林等官。前往檢查。恐責成不專。徒致歲月久稽。汗青無日。蓋此書移貯年深。旣多殘缺。又原編體例。分韻類次。先已

割裂原文。首尾難期貫串。特因當時採摭甚博。其中或有古書善本。世不恒見。今就各門彙訂。可以湊合成部者。亦足廣名山石室之藏。著卽派軍機大臣爲總裁官。仍於翰林等官內。選定員數。責令及時專司查核。將原書詳細檢閱。並將圖書集成互爲較覈。擇其未經採錄而實在流傳已少。

尙可裒集成編者。先行摘開目錄奏聞。候
朕裁定。其應如何酌定規條。卽著派出之
大臣詳悉議奏。至朱筠所奏。每書必校其
得失。撮舉大旨。叙於本書卷首之處。若欲
倣劉向校書序錄成規。未免過於繁冗。但
向閱內府所貯康熙年間舊藏書籍。多有
摘叙簡明畧節。附夾本書之內。於檢查洵

爲有益。應俟移取各省購書全到時。卽令
承辦各員。將書中要指彙括。摘叙厓畧。粘
貼開卷副頁右方。用便觀覽。

是月。

諭。昨據軍機大臣議覆朱筠條奏。校覈永樂
大典一摺。已降旨。派軍機大臣爲總裁。揀
選翰林等官。詳定規條。酌量辦理。茲檢閱

原書卷首序文。其言采掇蒐羅。頗稱浩博。謂足津逮四庫。及覈之書中。別部區函。編韻分字。意在貪多務得。不出類書窠臼。是以踳駁乖離。於體例未爲允協。卽如所用韻次。不依唐宋舊部。惟以洪武正韻爲斷。已覺凌雜不倫。况經訓爲羣籍根源。乃因各韻輾轉。於易先列蒙卦。於詩先列大東。

於周禮先列冬官。且採用各字。不論易書詩禮春秋之序。前後錯互。甚至載八六書篆隸真草字樣。撫拾米芾趙孟頫字格。描頭畫角。支離無謂。至儒書之外。攔入釋典道經。於柱下史專掌藏書。守先待後之義。尤爲鑿柄不合。朕意從來四庫書目。以經史子集爲綱領。裒集分儲。實古今不易之

法。是書旣遺編淵海。若準此以採擷所登。用廣石渠金匱之藏。較爲有益。著再添派王際華。裘曰修爲總裁官。卽會同遴簡分校各員。悉心酌定條例。將永樂大典分析校覈。除本係現在通行。及雖屬古書。而詞義無關典要者。不必再行采錄外。其實在流傳已少。其書足資啟牖後學。廣益多聞。

者。卽將書名摘出。撮舉著書大旨。叙列目錄。進呈。候朕裁定。彙付剞劂。其中有書無可採。而其名未可盡沒者。祇須註出簡明畧節。以佐流傳考訂之用。不必將全部付梓。副朕裨補闕遺。嘉惠士林至意。再是書卷帙如此繁重。而明代葢役。僅閱六年。今諸臣從事釐輯。更係棄多取少。自當刻期

皇朝詩林典故 卷三十三
告竣。不得任意稽延。徒誚汗青無日。

是年五月。

諭朕幾餘懋學典冊時披。念當文治修明之會。而古今載籍。未能蒐羅大備。其何以裨藝林而光策府。爰命四方大吏。加意采訪。彙上於朝。又以翰林院舊藏明代永樂大典。其中墜簡逸篇。往往而在。並勅開局編

校芟蕪取腴。每多世不經見之本。而外省
奏進書目。名山秘笈。亦頗裒括無遺。合之
大內所儲。朝紳所獻。計不下萬餘種。自昔
圖書之富。於斯爲盛。特詔詞臣詳爲勘覈。
釐其應刊。應鈔。應存者。繫以提要。輯成總
目。依經史子集。部分類聚。命爲四庫全書。
簡皇子大臣爲總裁。以董之。間取各書繙

閱有可發揮者。親爲評詠。題識簡端。以次
付之剞劂。使遠近流傳。嘉惠來學。其應鈔
各種。則於雲集京師士子中。擇其能書者。
給札分鈔。共成善本。以廣蘭臺石渠之藏。
第念全書卷帙浩如煙海。將來皮弄宮庭。
不啻連楹充棟。檢玩爲難。惟摘藻堂向爲
宮中陳設書籍之所。牙籤插架。原按四庫

編排。朕每憩此觀書。取攜最便。著於全書
中。擷其精華。繕爲薈要。其篇式一如全書
之例。蓋彼極其博。此取其精。不相妨而適
相助。庶幾縹緗羅列。得以隨時流覽。更足
資好古敏求之益。著總裁于敏中。王際華
專司其事。書成卽以此冠於薈要首部。以
代弁言。

是年。

勅撰音韻述微。

三十九年。

諭國家當文治修明之會。所有古今載籍。宜及時蒐羅大備。以光策府而裨藝林。因降旨。命各督撫加意採訪。彙上於朝。旋據各省陸續奏送。而江浙兩省藏書家呈獻者。

種數尤多。廷臣中亦有紛紛奏進者。因命
詞臣分別校勘。應刊應錄。以廣流傳。其進
書百種以上者。並命擇其中精醇之本。進
呈乙覽。朕幾餘親爲評詠。題識簡端。復命
將進到各書。於篇首用翰林院印。並加鈐
記。載明年月姓名於面頁。俟將來辦竣後。
仍給還各本家。自行收藏。其已經題詠諸

皇朝詩林典故 卷三十三
本並令書館先行錄副。卽將原書發還。俾收藏之人。益增榮幸。

四十年。

勅撰通鑑綱目三編。

四十二年。

勅撰

欽定日下舊聞考。

五十六年。

勅校勘石刻十三經。

嘉慶四年。

勅恭纂

高宗純皇帝實錄。

聖訓。

六年。

勅重修國朝宮史。

八年。

諭四庫全書內恭繕

皇考高宗純皇帝聖製詩文存貯諸閣。

奎文炳煥垂訓萬古惟

聖製詩自四集以後文自二集以後俱未繕

寫恭貯。理宜敬謹增入。此外如

八旬萬壽盛典。及續辦方畧。紀畧等書。亦應一體繕入庋藏。

謹按我

國家稽古右文。自

世祖章皇帝開國以來。屢

詔儒臣編輯諸書。不下數十百種。誠今古藝

林之極盛。節次所奉

皇朝詩林典故 卷二十二
綸音具詳

實錄國史。茲恭錄

訓諭史官。及有關纂書體例者。備書於冊。以

昭載筆諸臣之法。守至

高宗純皇帝勅編四庫全書。及我

皇上續增四庫全書歸架。

文思光被。疊旦重暉。尤足垂示萬禩。仰見

兩朝文治之極盛云。

十二

皇朝詞林典故卷三十一



